

四庫全書

集部

欽定四庫全書

集部

元音卷三

四

詳校官中書_臣丁榮祚

助教_臣常循覆勘

總校官降調編修_臣倉聖脉

校對官修撰_臣吳錫齡

謄錄監生_臣鄒世俊

欽定四庫全書

元音卷三

袁桷

字伯長號清容四
明人參知政事

次韻元復初春思三首

凍樹回青陽羈禽競新哢喧喧人語浮稍稍春事動澄
心絕芳華小睡足幽夢夢覺天宇新朝光集飛棟

游塵逐平皋秀色翳榛莽油雲互東西鬱抑不能雨昭
蘓在玄功竟夕復延佇何當挾其顛振翮窮委羽

遠客芳草思湛湛天外舟坐令親知疏低徊此淹留古
樹擢奇石清流匯芳洲素心諒有在胡不為茲游

送邵元道四首

仲連匡世姿揮手却秦軍掩袂停白日登車抗浮雲射
書誠草草孤城死生分辭榮敦厚俗矯抗離其羣

虞卿舌轉九揣事精微芒事危見交態窮愁名益光黃
金散逝水白壁凝飛霜丈夫有定志得失非豫防

梅生一尉微喋喋正天紀洗心洞玄化削跡無妻子龍

變孰為馴蟬蛻乃真止松迴風泠泠水落石齒齒

襄陽孟浩然拂衣歸故山放懷巖壑深流泳遺人間舉
袖林花落擊楫江鷗還羊公碑墮淚水聲日潺潺

送王繼學馬伯庸分院上都二首

玉京高處雪流脂連插鷄翹綠鬢垂蹀躞有泥歌獨漉
琵琶無夢說相思黑河舊樂催填譜白海名花擬進詞
羽獵上林俱罷賦卿雲何以報明時

淺坡平疊磧漫漫拂嶺青帘卷盡看氍毹屋起營羊腴熟

土房催頓馬通乾
捫官走驛傳金碗
水正分奩貯玉盤
莫上鄉臺望南北
白雲微處是槍竿

觀物

黃河不信從天下
濟水那知有伏流
自古乾坤合神化
空將簡牘費冥搜
張華博物身終死
鄒衍談天舌竟休
我亦從今銷綺語
春風碧眼玩沙鷗

寄開元奎律師

雙塔亭亭透夕陽
芭蕉深處碧窗涼
江神夜聽光明偈

天女朝分解脫香齋鉢午空烏守樹經堂雲冷鶴歸房
平生欲結西方社似怪淵明作吏忙

無題次馬伯庸韻四首

金縷歌殘月滿江玉顏曾憶侍油幢象床雲重思專一
鯨錦波翻賜疊雙春淺正宜氍作幕夜涼深恨魴為窓
浣紗可是無虛匹側足寒溪濺石淙

翠簾匝匝護朱光千葉宮桃滿院香閨苑有鸞通尺素
虛橋無鵲寄流黃上林賦罷歸巴蜀興慶詞工謫夜郎

不是月中親度曲世人那解聽霓裳

相期來似石城潮日望晴虹結綵橋却月眉愁歌漸遠
凌波步近意非遙抽琴有恨迴清角疊袖無塵轉綠腰
弄玉最憐隨鳳去秋來誰與伴吹簫

白髮詞臣兩耳垂華腴堆笏陋牛醫宮娥引燭催麻日
院吏傳更寫制時蠟然化生秋夕賜翠標疊勝歲華移
低頭欲說唐朝舊願侍虛皇進玉卮

海狗巢石圖

複壁層峰負六鰲藥欄花檻翠周遭如何畫史同羣吠
不與君王繪旅葵

葛仙翁移居圖

翁媼相携入翠微轉頭猶有可憐兒丹砂不是神仙藥
勾漏歸來鬢已絲

宮女度曲圖

望瀛法曲紫霞觴更按伊州奉玉皇翠竹涼深宮院密
新聲那得過宮牆

次韻王繼學竹枝宛轉詞

聞郎腰瘦寄當歸望盡天邊破鏡飛昨夜燈花圓似粟
倚門不肯送郎衣

盧亘

字彥威汲郡人翰林待制

送鄧善之提舉江淞十首

北門古深嚴論思寄籌度自非鴻才士訓誥何猶作夫
君出巴蜀文采動京洛十年掌絲綸摘藻揚景鑠荆璞
抱瑾瑜龍淵淬鋒鏑肯獻上林賦寧居天祿閣即今觀

浙江眷戀睇金雀黃圖鬱紫氛絳節生碧落依然難為
情清霜養飛藿

春秋嚴筆削凜若執玄鉞君獨抱遺經結髮飽剗劂明
剖是非心微探義理窟下視羣兒愚爭端王正月竭來
奮直筆浩然心思竭王功與帝德昭昭日月揭胡為厭
詞林擬欲觀溟渤榮華若浮烟汗簡青不滅

詞林富聲華幾人得精悍悠悠三百年篇翰孰承續夫
君清廟器裸薦盛圭瓚五就惜繁纓九游載雲罕依依

風向翔忽忽月新滿冷然時雨情短章不可斷

風雨妬芳華稂莠深嘉谷天地豈不仁盛德稟命獨明
廷萃羣英四門延穆穆既卜渭水釣又起傳巖築聲華
何岌岌衆輻輳一轂鑿坡儼清韻碩人歌在軸願言往
從之星駕命宜夙豈知彼玄鳥戢翼辭雲屋幸無素絲
悲庶免窮途哭

離離天星高皓皓雲月光候鴈過楚澤蟋蟀鳴中堂天
時諒難測徒然多感傷念子去意遠沉憂結衷腸憶昔

初奉歡露白春蘭芳清尊罷新製妙趣深濠梁飛景急
西匿川流浩湯湯玄髮淒歲晚木脫天雨霜蔓草豈容
惜松栢在高岡

翰林子元子武庫森戈矛英聲邁千古逸韻橫九州與
君契金蘭投分何綢繆清和謝夷惠典刑追韓歐坐令
人文煥允塞昭王猷念君獨遠邁寥落行人愁木瘦楚
山曉風淨寒江流何當駕飛車却宴崑崙丘塵埃滿腥
腐朝莫同蜉蝣

暘谷上寒日影射扶桑枝瞬息及中天流光迅難持人
生百年內昂昂何所施孤鴻東南征浮雲西北馳可憐
萬感身會合須臾期安得弄明月皎皎遠憂疑折花笑
蓉浦蕩漿江潢涯優游以卒歲身名良不墮

游雲蒼鱗穹閭闔不可叫徒令虎豹闕日月近輝耀濛
濛八表塵隱隱萬壘竅泯然一歸途伊誰執其要栖栖
聖者徒禮樂懷窈眇閉門忍朝飢風雨深蓬蓼今年江
海去光景短螢燭禾黍滿故墟間巷餘返照揮絃送飛

鴻今古入長嘯

昔我適吳會日夕承歡顏高堂樂起舞綵服何編爛東
潮洶波濤西湖翠烟鬟北歸餘十年謬跡通朝班家禍
一朝集音容何可攀悲號蒼穹迫往事思日艱命窮時
亦迫志弱體自孱安得騰化術從君超人寰執手不忍
訣臨風涕空潛

我留君勿思君歸我當憶十年膠在漆一旦各異域吳
江激微波震澤起暝色鷗鵬隔天地鴈鴛離南北念我

平生友愴恨摧胸臆獨看燕山雲歲暮日初昃永言長
風翔情寄南飛翼

題金顯宗墨竹

天人賦物如天工墨光洒竹回天容千年勁玉寒不死
清波照響悲吟龍烟凝草綠承華殿鬼冷秋霜月如練
長毫寫影竹不知子夜歌殘空記面春雲一散風吹塵
茫茫海色翻青鱗金仙淚痕愁漢月尚憐玉軸隨時新
夢跨茅龍上天去女媧補天天不語海綃畫鸞生翠羽

踏破銀灣濕河鼓射龍江深春不度風色蕭蕭怨千古

題張國綱理問塞河詩卷

導河積石堯解憂滔天之水成安流何年決齧半南土
清淮怒卷黃雲愁宣房既築漢歌喜越巫抱壁神光起
害除梁楚二渠成海溢西南九河死後來羣策知誰賢
何人捧土能防川彭城樓堞照黃土河平堰石愁金天
吾皇放勲超萬古澤世餘功平水土睢陽塞決付賢侯
解變狂瀾作安堵于今此功寧復有從容小試經綸手

千年遺愛在邦民春風吹水濃如酒

馮海粟

字子正

塔燈

擎天一柱礙雲低破暗功同日月齊
半夜火龍蟠地軸
八方星象下天梯
光搖灔澦沿珠蚌影落滄溟照水犀
文焰逼人高萬丈倒提鐵筆向空題

胡寬

大明宮早朝

蓬萊拂曙色煜煜舒祥光九儀肅清蹕日月開旂常聖
人握金鏡繡袞臨玉堂咸英備雅奏圭璧輯羣方歡燕
洽湛露敷恩煥龍章謳歌罄率土豈樂逢時康典文極
藻績聲烈照前王巍巍績鴻緒萬年斯無疆

劉致

字時中河東
人翰林待制

青樓曲

峭寒暗襲雲藍綺鮫帳惜惜夜如水美人骨醉紅玉軟
滿眼春酣不忺起幽禽關關喚霜曙金壁屑蘓溢香霧

有生只合老溫柔
壁月長教掛瑤樹
鴛鴦同心暗中結
滿意芳蘭煖紅雪
癡雲騷雨自年年
不管人間有離別

秋雨吟

溼螢閃光飛不起
八尺風漪夜如水
仙姝不眠肌骨清
起馭夜涼吹玉笙
曲中忽作孤鳳鳴
天帝感泣秋雨零
早龍暘死嗟莫及
坐見扶桑落葉濕
前溪水高龍夜吟
不管西郊老農泣

淮南歌

甓社湖中出明月斯須千山萬山白燭龍馳影不敢眠
淮土風煙黯無色鼃鼃起啼鰕鱖舞荷風驚濤戰南浦
湖天無光湖水立夜半行空洒飛雨東方搖搖天欲曙
畢逋啼老扶桑樹淮天幽幽澹空素老蚌潛輝寂無處

姑蘇臺

麋鹿應知易代頻吳趨誰唱不堪聞捧心臺暗梨花月
扶目門深薜荔雲江閣水犀歐冶劍氣騰金虎闔廬墳
計然已死鴟夷逝寂寞五湖西日曛

燕中懷古

荆卿墳上草離離
郭隗臺前對落暉
戰國山河秋氣肅
中原豪傑曉星稀
乾坤納納無人識
南北年年有鴈飛
誰似盧溝橋畔柳
安排青眼送將歸

富珠哩

字子翬
色目人
翰林學士

范墳詩

宋蜀郡開國公范鎮景仁謚忠文其一世盛德偉烈
光著史籍人固知之其葬在襄城汝安鄉推賢里載

東坡集中甚詳襄城故隸汝州邠來訪問故老其墳
儼然尚在已為野夫豪農耕為禾黍之區矣范氏當
金季猶有居墳左者自經兵燼不知所存拊事嘆閔
故為作詩以紀其概幸在官君子知其為先賢遺壠
庶有以處之

忠文我眉英始也跡甚微堂堂薛簡肅隲隲西南飛其
人古廉守肯持藟鬻歸所得一偉人天下大布衣引以
賓王家光映春官闈昭陵宋仁主前星久無輝犯諱言

所難雷電每霽威雄哉煉石手妙補天巍巍丞相江南
來雲掩扶桑暉舊得陳苦辭往往阨謗譏諸賢抗章疏
弱卒攻堅圍公力幹禹鼎正氣陴黃扉荆舒憤至骨斤
語筆自揮贈之以蕙蘭何往無芳菲時公與司馬聲諧
玉琴徽解冠掛神武甘老西山薇九寓日瞢瞢赤子將
疇依兩公幸無恙起拯或庶幾嗣君元祐初痛洗前人
非民望屬司馬欲邀天為戰帝命起公卧門久車馬駢
君實了吾事此外何所希清風溢寰海不啻嚴陵磯公

既晚家許道德人所腓襄城卜封竈汝潁皆京圻我來
訪遺壠名姓存依稀來仍散兵燼雨雪無留霏公名在
天下豈逐薤露晞誰能禁耕牧盛事乘新機吾力不足
振感嘆徒歔歔

閱故唐宮

錦帆走滅淮海波虬髯起操湯武戈盪民瘡痍六朝下
天開百二秦山河我來徬徨舊宮土細麥繁花忽誰主
終南王氣三百年仙李春風已千古春風吹夢天茫茫

玉樓金殿春雲香開元舞馬散冥冥紇干凍雀含悲涼
世態倉皇幾煙霧秦漢英靈不知處崑崙河脉自西來
湘浦鴈行今北去

劉伯顏

字明叟

大駕還宮

宮闕歡迎大駕還九衢香霧拜天顏龍旗影裏明鈇鉞
鼙鼓聲中襍佩環肅肅錦衣人似海亭亭黃屋象如山
封囊久欲排閭闔願溥斯仁澤世間

曹元用

字子貞汶上人禮部尚書

次馬伯庸尚書韻

柳簇金溝蘸碧波
雲深玉闕瞰重坡
鳳凰曲奏鈞天樂
烏鵲橋通織女河
萬井閭閻春浩蕩
六街車馬曉坡陀
山人素有林泉興
奈此承明夜直何

張伯遠

餞祝直清

朝餐狙林橡
夕飲虎窟泉
幽棲豈不逸
於道為未全
是

以少微星含輝麗中天雲蘿謝招隱冠帶趨興賢魯生
贊制作商老安疑然董子述徵驗賈誼明經權盛德有
遭逢志士無棄捐長貧若忘世一出垂千年折梅楚山
阿賦詩江水邊寂寞思古人中懷為君宣

李材

字子
構

過黃陵廟

黃陵廟前湘水綠天寒漁郎唱巴曲沙棠舟上月蒼蒼
翠蛟白蜃江茫茫似聞清愁五十柱萬里鴻飛楓葉暮

神鴉翻舞祠門開珠裳玉袖霑莓苔玄猿晝啼薜蘿影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅
靈風自吹烟霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭水落生層波裴回獨詠騷人歌

壽杜侍郎

黃閣老臣踵夔皋法冠蒼佩陪霓旄八龍委蛇卷春水
一鶚搏控明秋毫華勛玉策耀天府雄章銀筆翻雲濤

舉觴獻壽碧桃晚南極正與文星高

老松怪栢圖

仙人解衣盤薄羸造化慘淡秋毫端枝柯千尺入層漢
笙簫萬壑鳴驚湍堂中日月不可老壁上雷雨何當乾
我來醉卧北窓下夢跨黃鵠天風寒

和春詩

鶯啼燕語花漸稀天明海碧涵晴暉洛陽臺榭春色在
山陰衣冠昔人非夢雲何處燕瑤席舞雪誰家栽苧衣

獨有倚樓無限意年年烟草暮鴻飛

次韻裴都事朝回

海上瓊樓接五城人間歌吹近蓬瀛雲移豹尾旌旗暖
日射螭頭劒戟明拜舞盡隨仙仗入退歸遙聽玉珂鳴
欣欣百草含春意得傍東君暖處生

海子上即事

馳道塵香逐玉珂彤樓花暗弄雲和光風已轉瀛洲草
細雨微添太液波月榭管絃鳴曙早水亭簾幙受寒多

少年易動傷春感
喚取青娥對酒歌

送省郎楊耀卿使雲南

飄飄使節出金閨
郭隗臺前暫解携
天入五溪無鴈到
地經三峽有猿啼
子雲舊里風烟在
太尉家聲日月齊
後夜客槎何處望
秋河迢遞碧雲低

禁城秋夕

絳宮星淡海無波
九陌猶聞動玉珂
閭闔微雲藏夕漏
建章明月掛秋河
此身天地流萍遠
故國關山落木多

欲聽鈞天塵夢隔紫簫吹盡桂婆娑

鄧文原

字善之巴西人國子祭酒

雨中次范德機見寄雜興韻

窮巷積陰雨離居寡悰情安得塩埃風逍遙余上征長
日有逝川春花無晚榮永懷山澤居好遯潛英聲於陵
方灌園龐公不入城此意豈忘世詠歌以濯清今我夢
江國嗷嗷鵲鳩鳴不憂芳草歇但恐白髮生歸休企前
哲矢言著貞誠悠悠莫識察思子攜手行

都中送元傑道士南歸

授節仙山得過家都門津柳動春華還鄉近侶千年鶴
奉使榮於八月槎古井雲封丹竈藥舊松風掃石壇花
道人冠劍鳴瑤珮豈必高車畫錦誇

奉題延祐宸翰

欽惟仁宗上承祖武蒐羅俊彥求治靡寧尤尊禮儒
臣務敦風化由是治書侍御史臣郭貫擢禮部尚書
凡在選者六人惟貫進秩有加親洒宸翰昭示龍光

忝備臣僚咸增鼓舞集賢直學士臣鄧文原謹拜手
稽首而作詩曰

宵旰需賢表薦紳秩宗首選贊華勛官聯天府璇璣象
帝闡河圖琬琰文曾聽簫韶瞻曉日仰攀弓劍泣秋雲
小臣作頌稱仁聖湛露承恩未足云

題小薛王畫鹿

禮樂河間雅好儒曾陪校獵奉鑾輿晝長靈囿觀游後
政暇嘉賓燕集餘蛺蝶圖工人去久騶虞詩好化行初

宗藩翰墨留珍賞憑仗相如賦子虛

題謝氏通濟橋

汾陽川上壓雲濤迥若仙山駕巨鼇
甃石不愁僧路滑傾金寧計鬼工勞
泛槎客去銀河近題柱人歸玉壘高
此地通津足佳興楚歌明月放輕舸

郎中蘇公哀挽

志道

塞垣重鎮雪雲堆畫諾人稱幕府材
流馬道艱逢歲儉涸魚民病得春回
陽關猶記歌三疊杜老俄成賦八哀

夜靜燕臺山月冷祗疑化鶴一歸來

送李彥謙御史之西臺

霜風十月長安道健鶻凌空淨羽毛地控函關西極重
星聯執法太微高鑄金古鼎奸先伏發及新硎用欲韜
雅志澄清付公等我懷江海放漁舠

送鮮于伯機之官浙東

衣冠文獻叅諸老臺閣功名負此公十載黃塵看去馬
萬山青眼送飛鴻揮毫對客風生座載酒論詩月滿篷

昭世需材公論定起分春雨淞江東

送張綱父教官

我友白蘋洲畔客忽凌風雪問征途南州歲晚尋高士
西塞烟深憶釣徒呼酒江船春水動讀書山館雨燈孤
無錢自媿蘇司業聊賦驪駒為子娛

贈趙鍊師奉祠南海會稽

函香南國羽衣師東曉稽山謁禹祠使馭穩如乘白鶴
仙都歸及采玄芝文園進藁無封禪宣室求言有受釐

書執會同靈貺閣詞人休謨九歌辭

題陶淵明像

詩中甲子春秋筆籬下黃花雨露枝
便向斜川頻載酒
風光不似義熙時

馬祖常

字伯庸浚儀人御史中丞

書上都學官齋壁

齋居芹宮旁
永日少人跡
清心慕古蹟
簡編綯繹徒
自傷迷民位
卑方莫及苟
祿亦可羞
吾將返蓬華

至治癸亥八月望日同袁伯長虞伯生過槍竿

嶺馬上聯句

有嶺名槍竿其上若棧閣白雲亂石齒青峰轉窳脚積
冰太古陰出礦無底壑馬飲沆瀣泉鷹盪扶搖幕轍跡
委垂神人聲發虛索鳥飛接鳥背羽沒疑虎膊霧松秋
髮長霜果紅脂薄斤樵不知疲獨徃端有愕兢兢矛頭
浙杭杭井上索凝睇見日觀引手操月廓南下渺沆海
北廣終沙漠金橋迎仙游寶塔百神鑿禽鳴蜀帝魂鐵

鑄石郎錯闌干掛鈎衝橈槍斂鋒鏑屬車建前茅馳道
徇嚴柝載筆三人行弭節半途却

贈陳衆仲秀才纈雲辭

纈雲織波射金水郎君水西著皮履南陌紫塵十丈高
捋鬚買酒意氣豪萬里將書憑好鳥荔枝千顆團團小
天津不隔少微星閭闔門開夜光曉

寄家書

春雲閣雨花泥少池上波平飛白鳥薊中河外盡天涯

蓮葉圓時身到家

挽何得之先生

手織烏紗日賣錢
全家移住五雲邊
伏生有女書空在
伯道無兒世共憐
北市行歌花爛漫
西亭坐嘯月嬋娟
少微光氣今年暗
知是詩隨過海船

送王叅政上京奏選二首

滇池細馬踏龍沙
宰相朝天路不賒
峽裏琴泉春作乳
月中珠樹夜生花
三千禮樂尊儒術
百二山河壯帝家

魚上禹門無點額直郎宣奏日當衙

千官吉日聽宣麻白髮詞臣帝汝嘉池鳳有毛皆五色
藍珠無樹不三花綠綈詔底書分雨紅錦囊中字剪霞
天路北盤三十六歸時秋月滿京華

開平事

金馬門東畫省西千官花覆曙光低九莖芝蓋雲衣合
百石銅盤露顆齊鹿柵已營脩竹鳴燕巢還補落花泥
上林伏日金桃熟鸚鵡來時不敢棲

還過龍門

紫塞秋高鳳輦回龍門有客去還來
蕩摩日月崑崙圻吐納風雲混沌開
天帝有神司主宰地靈無力載崔嵬
誰吹石瀨成飛雨不使時人汙酒盃

駕發

紫繡鸞旗不受風北都駕發日曛曛
九秋宮殿明天外十部簫韶起伏中
白海水波浮曉綠赤城花蕊帶春紅
神皋不用清塵雨輦路龍沙草藉重

龍虎臺應制

龍虎臺高秋意多，翠華來日似鑾坡。
天將山海為城塹，人傍雲霞作綺羅。
周穆故慙黃竹賦，漢高空奏大風歌。
兩京巡狩非行幸，要使蒼生樂至和。

正月十一日大明殿後寢殿進講畢賜侍宴

勸講經帷只尺天，聖恩留侍大明筵。
東風律應軒轅樂，左个陽開月令篇。
春動仗旗回彩暈，日浮牕瑣炫華鮮。
百珍水陸難名品，因笑傳柑詫昔年。

宣德府九十三歲老人

我無麴蘖為春酒翁得期願作壽朋鳩杖賜來堪佚老
鵝梁辭去不同升五原白草春迷樹一曲黃河夜合冰
古有乞言今可待逍遙全福見玄曾

光山縣孔宰幽風亭

光山近在故山西樹滿岡頭稻滿畦隣屋讀書相教授
社祠醉酒共提携水牛礪角嫌耕淺野繭抽絲喜價低
春雨行田無從吏獨騎齋馬畏青泥

次韻進士宋顯夫海岸春行

靈沼春波殿影高
行人苑外望蟠桃
街塵曙雨沉紅霧
宮瓦晴霏動翠濤
鳥度鏡中還避彈
魚跳船尾不因篙
曲江別有新承宴
笑我官曹似馬曹

次韻送上官伯圭

閭闔風吹禹別州
才華生世重前旒
終軍關右須乘傳
王粲荆南不上樓
黃鶴白雲鸚鵡夢
金陵江水鳳凰游
東船載雨瀟湘上
柿葉題詩寄十洲

送宋顯夫南歸

琵琶溝北識君初，藉甚朱華二十餘。
欲賦兔園干孝邸，不同狗監薦相如。
瀟湘路熟逢知己，韋杜天低望故居。
携幼歸來拜丘隴，南遊莫戀武昌魚。

菊枕

東籬采采數枝霜，包裹西風入夢涼。
半夜歸心三徑遠，一囊秋色四屏香。
床頭未覺黃金盡，鏡底難教白髮長。
幾度醉來消不得，卧收清氣入詩腸。

寄淡淵提點

仙客吹簫踏月輪因游淮海誤尋真松花搗藥分貧士
柿葉題詩寄遠人秋浦有潮留載酒春雲不雨取裁巾
江都千樹隋宮柳曾見先生綠髮新

御溝春日偶成

御溝流水曉潺潺直似長虹曲似環流入宮牆才一尺
便分天上與人間

劉復

字聲七
三山人

贈臧魯山廉訪

肅政光華遠清臺啟授公節移梅嶺北輶發桂江東楮
帳篩寒月椰杯鼓朔風瘦童空挾杖貧病不裝狨徼俗
三年問威名百郡雄星芒垂許洛雪色照賓融敷教有
虞廟講經夫子宫端嚴銀鑛戾易直牖倥侗吏猾加咎
竹官貪解印銅冤銷千褐父恩浹萬黃童花繖戲冬暖
瓠笙吹歲豐仁頻苞嫩綠古辣釀輕紅象跡烟中堞鯨
波雨外篷夷珠人有斛粵布我無筒剖決心如水驅馳

髻已蓬六條方奏最四壯欲歌功為有澄清志遲輸獻
納忠織雲添衣繡鞭霆亦乘驄楚尾吳頭會三湘七澤
通天文恢翼軫地蓋接潭洪牙纛聯分政旌旗列揔戎
驚爭肥似鴈羆搏猛於熊懷壁枉無罪見金忘有躬化
源安溷溷獄市積忽忽大器能繩物先聲已擊蒙道傍
豺果避窟底兔幾空勿珥終凶筆母關報怨弓左饅并
右粥後稷更先種采菊賦歸老愛蓮無極翁理明輕勢
利語妙入盲聾文祖歐陽古詩宗魯直工挽回鉛槧習

超出簿書叢顧盼山須動掄揚石可礮羽儀傾振鷺啄
菀徧哀鴻念昔初騰踏時方息戰攻考工崖黯黯試壘
海隴隴赤芾彼三百素絲茲五總穩行卑劍閣善納小
雲夢甲子從頭數冠紳進秩穹階蘭香浣露田玉氣噓
虹世或探斯鷺吾寧牯爾撞察魚應小慧聽蟻豈真聰
靜躁聆徽外剛柔省穀中江湖歸獨步宇宙涉丹衷德
驥曾思附仙舟偶未同耐寒衣故白好古佩仍蔥夢枕
頻鮮荔羈帆幾落楓泥塗龜各曳霄漢鳳稀冲厲操期

霜栢吞聲等爨桐漸忘身顯晦得究學初終韓子哦雙
鳥莊生感二蟲樂芊晞行行憂杞笑忡忡選舉繁唐盛
方聞及漢崇貢琛凌渤澥懷組際穹窿穀欠防飢歛鹽
因析利籠駭民牛穀棘虛士鶴毳毳黼黻需耆俊饗珍
給老癯會看楊綰貴不許孟郊窮溫井覘陽長明奎卜
道隆斲辭規愛助華髮尚狂侗

春日郊行書與鄧善之別五首

在山水非清出山水非濁泉源但無壅滄海端可學

風急低卷帆潮來直扶柁我舟如我心鷗鳥亦忘我
動心趨蹶間治氣憐不早緩步勿貪高登山良有道
東風吹紙鳶衆目看不眩出處亦兒嬉善收存一線
文鷄照水影五彩何繽紛鳳凰靈且瑞在德不在文

戴表元

字帥初
剡溪人

題范文正公書伯夷頌後

有耳不聽下俚巴人有手不寫劇秦美新天生靈物寄
我體可惜穢棄同埃塵清風百世希文老一字流傳今

是寶誰知堂堂伯夷頌曾借春暉發枯槁韓子也復英
雄姿冰寒斗峻餘文辭吹噓自起北海隱膾炙聊慰西
山飢天荒地老精靈在處處江湖虹散彩書離孔氏忽
自歸金遇龔侯如有待世情愛古兼愛奇書奴蒲眼非
吾師請君焚香盥手拜此帖歸洗人間兒女癡

胡長孺

字汲仲號石塘永
康人寧海主簿

題段郁文雪石

白雲飛來著春空翕霍變化生奇峰朝曦照耀舒復卷

碧華忽擁玻璃宮，秋潮初壯明於雪。千雷動地吳山裂，
濤頭出海夕陽微。百鍊青銅浮玉玦，雲容濤勢偉且奇。
乍出乍沒須臾時，乾竺雪山白盈尺。晴天萬里窺蛾眉，
似識詩翁作詩苦。獨擁清妍照環堵，河翻月落夜未央。
如虹光氣飛屋梁。

題醉王母圖

宴罷瑤池醉不任，仙人那有世人心。良工欲寫無言意，
自托丹青作酒箴。

元音卷三

欽定四庫全書

元音卷四

范梈

字德機臨江人憲司知事

贈方永叔往教重慶路

汲水得明月倒影上青天客行三十年未識蜀月圓中
宵夢巴蜀秣馬辭燕服成都雖云遠未到意已足遠意
不可期宿夕宛見之雲迷飛鳥道雨急卧龍祠干戈何
草草祇說渝州好但得渝州官甘就渝州老渝州古雄

城彭君舊建旌至今江石上猶有古時名豪傑世已矣
空城俯流水復有江東人來教渝州士方侯天機深大
雅託遺音沉潛萬夫敵脫畧五湖心翩然別我往長揖
仙人掌疾風吹大旗落日明斜舫即此少相知相知長
恨思巫山桂樹發折寄定何時

節婦王氏

妾年四二三始識月團圓十二學女工刺綉如鴛鴦十
九嫁夫家事姑施衿鞶夫婿良家兒世籍為王官雖聯

朱紫貴不習綺與紈過庭執詩禮開口若驚湍風儀在
一時爭作玉人看天地忽降毒摧折青琅玕回首四十
春景光若流九貞心守松栢芳性軼芝蘭落月簾帷曙
西風機杼寒沉思往昔事淚下紅闌干豪客至茅屋舉
家竄林巒入房衛病姑身死白刃攢相向義憐釋視死
色無難親知為歎息保社為辛酸欲與上州府為妾旌
門闢妾實無所願所願在所安婦人往從人阿母涕洟
瀾送行遺之語敬順無違歡匹偶固有時寧知憂患端

辛苦蹈物變豈羨身獨完殷勤謝舊故聞者摧肺肝

濡露亭

初秋白露降爽氣逼虛幃薄林方泥泥洒漢復霏霏暗
襲玉堂悄斜飄金掌微鶴眠寒屢警螢火濕猶飛葉垂
知月朗花艷怯陽晞蘭飲畏朝墜草沾傷夕歸為霜當
宿戒去日寢增歎娉婷吳宮女三月采薔薇挹彼枝上
香散入舞裳衣千歲亦不減但恐願初違君子保世澤
在久愈光輝

贈別張清夫還吳

新雨不作泥，鈎輈樹上啼。
征夫懷遠路，家在太湖西。
別家今幾度，楊柳江邊樹。
念卿車輪下，漸是中年路。
萬事中年尚可期，人生旦暮長別離。
長別離，向何方？九河落
花清浦香。王睢斑斑鳬乳黃，南望不見三高堂。
奈此游子思故鄉。我家朱公濟時早，功成身退合天道。
當時未必知者賢，挽不回之卧烟島。
後來閱盡虧成事，始識從初去時好。
我不能赤手縛虹蜺，又豈委身同草木生逢

堯舜世肯受泥塗辱昨者誤奮龍門雷螻蛄嘲之自云
足憂來舉觴酹白日唯有皇天照空谷張公子吳江生
我有千載意不羨身後名為君寫作送行曲曲中鏗戛
難為情君行不聽我意不平明日買船棹秋聲亦欲東
下窺滄瀛飄然始去白玉京湏君禹穴相逢迎相迎不
見湏相待客行雖遲心不改

題先天觀山水圖

學仙之人與山為徒住在匡廬之與湖江之區張公鍊

丹作龍虎丹成御氣遊六虛後來作者絕代無復有逸
人住玄都玄都之壇井角孤上摩萬里之黃鵠下伏千
尺之飢鼯陰森檜筠自太古斬種力與開闢俱搏桑朝
日挂絕壁照見樓觀青糝糊擘厓控絃寫哀壑秋雲春
露芝田腴我亦人間山澤臞偶隨夔龍賓唐虞興來醉
倒黃公壚震風三日撼不蘇折花不得度弱水揮手始
識仙凡殊玉堂仙人危與吳遺我茲山之畫圖尋牕數
戶久歎息無緣置我雙擣捕獨行幽人不受呼掃葉青

澗聽啼鳥日暮蘿逕相縈紆相縈紆向何處明朝為借
麻姑鵬我亦騎之上天去

贈海康舉進士者

聖主徵儒用文學翩翩五士起海角元戎虎帳飛薦鶚
泮水成材玉新琢吉日舉餞鐘鼓作皇華大夫繡朱襖
快馬鑿蹄輪脫斲相送西風出郊郭問君此行事何若
於菟要是赤手縛候鴈南飛不踰岳洞庭山秋木葉落
詞場先鋒奪霜鏑萬里青山上黃鶴明光宮中問禮樂

董生策有經濟畧一朝聲名動河朔往取青紫如六博
前年禮闈開峻擢明當接武絲綸閣歸來錦衣照丘壑
人生無如進士樂嗚呼人生無如進士樂勗爾高步翔
寥廓

王氏能遠樓

遊莫羨天池鵬歸莫問遼東鶴人生萬事須自為跬步
江山即寥廓請君得酒勿少留為我痛酌能遠之高樓
醉捧勾吳匣中劍斫斷千秋萬古愁滄溟朝旭射燕甸

桑枝正搭虛窓面
昆侖池上碧桃花
舞盡東風千萬片
千萬片落誰家
願傾海水溢流霞
寄謝尊前望鄉客
底須惆悵惜天涯

杏葉黃

杏葉黃天雨霜
穹窿攜日照八荒
迴光照見白玉堂
堂中美人雙佩璫
中宵抱被直西廂
忠君愛親兩不忘
奈何零露沾衣裳
清曉樓頭見征鴈
不如謝官歸故鄉

轆轤怨

門前水揚聲似雨幽人當窓碧絃語東里征夫去不歸
一雙蛾眉鏡中舞年年井上攀轡轡勞心只恐秋葵枯
他年種得長生草梅花落盡青青好

雲林歌為貢供奉作

朝望宣城夕企雲林掃花釣月清我聞心城東之山倚
天碧手捫南斗近咫尺幽人築堂面山坐絕似謝公故
時宅謝公今何在蒼苔翦行跡調笙誦新詩流水照白
石看水作明鏡年光靜來往夜深敬亭雨坐見南湖長

清風被長阪鳥度菱葭響雲之林兮不可攀中有青猿
白鶴相盤桓林之雲兮不可縛時來宿我青簷端昂藏
老仙人抱琴卧山側憶在中華時相逢鬢未白問之不
笑亦不言阿家中子瀛州客却起遺我寶字書依稀攝
精練魂魄相期後天無極年共爾守之合自然御氣還
得同飛仙未登雲林堂試作雲林歌嗟我久客意衰邁
雲林雲林奈爾何

釣臺歌

吾慕嚴子陵隱居富春山故人乘六龍身隨魚鳥間羊
裘大澤雪在須忽來導從入皇都掉頭不受諫大夫高
風逸節何代無慎勿滄浪輕釣徒

首陽山圖

山漠漠兮谷逶迤中有二士形容饑問之不答告者誰
在昔父死人致國弟讓兄辭俱去之一朝隱居北海北
去亂就治歸人師遇世偶有戰伐事叩馬垂血陳忱辭
君王知名臣義直直不退聽將疑為見兵不果事乃定

耻食其粟隱於斯終然飢死茲山下到今稱誦猶當時
白旌黃鉞不可追功業甚盛德甚衰救民水火事誠危
三綱一失誰扶持是以聖人表其怨謂彼仁者良由茲
首陽之墳高幾尺自古富貴埋沒野草空纍纍我欲酌
北斗薦以黃金卮展圖涕漣洏此意畫者宜不知

贈李右丞

恂恂李右轄行義古人期緩急倉公傳勤勞衛母詩滄
波大地轉白首老天知莫寫青田鶴鳴臯重我思

贈別徐教授之欽州

冉冉歲月暮悠悠闕塞長歌鐘凝旅宴舞袖拂征艎到
日梅花亂來春蕙草芳南金自昔重寄贈可能忘

王繼學晚過舍下翌日惠詩一章用韻答貺

平生病太史淺陋愧曹邦自足封函谷聊湏壘受降黃
鐘知和寡白壁動成雙天外誰招得清風滿八窓

和李溉之園居禱詠四首

書劍上青霄鄉闕雨雪遙年華侵水竹客思墮山苗會

想商巖綺將從鄭里僑文辭誠小伎祇比俗情饒
豈是幽棲地飛騰亦未量城根分鼠壤池面合魚梁名
久喧郎署歌時感女桑畏卿音調苦疇復貴相忘

圓色依簾障天光切戶庭草生連夜雨花落遍池星未
遂翔寥廓真堪託晦暝逢時湏紫燕得意拂青萍

亦欲依家耳衡門斗極邊鄉心微化鶴宦逕跼飛鳶白
日拋書送青山拂檻延風流自無已憶上五湖船

絕句二首

江上打魚船有頭那無尾與卿相見時不望如魚水
鄉路西州是延平那向東片帆儂會使祇是怕隨風

十月九日詣天光門上進三朝實錄

儀鸞簇仗滿雲端玉鑰初聞衆樂攢三后龍光周典冊
羣臣鵠立漢衣冠爐烟著日浮晴靄宮樹班香試曉寒
千騎前頭都不避祇傳學士拜金鑾

辛酉歲元日

西山千仞鬱崔嵬山下樓臺紫翠開玉帛會同來萬國

璣衡縣運屬三台嘗聞海客談金鼎更見詞官進玉杯
慚愧辭臣今白首久無賦頌獻蓬萊

四月十六日詣東華門奉迎香輿

天香曉報出宮城已辨隅頭合樂迎黃鳥低斜衝隊過
紫駟踈蕩著班行百王盛祀無遺典萬乘深居有至情
失喜快傳湯沐賜禮官識姓未知名

送白無咎太守之郡

瀟洒中書舊省郎排雲曾攬舜衣裳一麾况復守名郡

萬事不如歸故鄉
馬首漸違燕闕雨
鴈聲欲度晉城霜
漢廷擇相皆良吏
蚤奉蒲輿謁建章

寄上甘肅吳右丞二首

要使唐虞化遠覃
玉門闕下屈征驂
多憂總為民心苦
有喜唯聞郡姓甘
日晚邊沙黃浼浼
天晴隴樹碧毵毵
國風不繫秦州外
自此西人識召南

塞上孤鷹白雪毛
塞門風物靜蕭騷
黃河西去從天下
秦華東來拔地高
枸杞莫將如意苴
醍醐足飲勝蒲萄

遙瞻圭袞還舟日正屬江湖心緒勞

寄題集賢周司直悠然閣

番陽東下萬山圍魁閣崢嶸面翠微雲接大荒迴古色
波涵落木動晴暉宦情靜與游魚逝詩思長隨夕鳥飛
久待倚闌成獨酌癡兒了事各須宜

張留公母

山風遙引紫雲車樓閣崢嶸阿母家更五十周重甲子
後三十歲一桃花綵衣故綰封留印白壁新隨蜀使查

見說麻姑舊行處至今源上有丹砂

奉和王繼學懷濟南舊遊

前輩風流逐斷澌濟南舊錄故人詩遙知靈運初游日
正是元方後載時青社寥寥成異物丹丘晶晶屬遐思
壯年易動離居感繾綣花前金屈卮

開歲

自違北極向南辰重見東皇似故人合席管絃方殿歲
殊鄉花柳覺先春水歸楚澤魚俱化土覆周郊獸亦仁

薄宦於時無補報且須康濟百年身

草堂

草堂不在萬山峯時有幽人步往蹤
雨壓牆煙籠薜荔石行渠水鑑芙蓉
清名豈讓陶貞白共住猶須陸士龍
忽憶鴈行天外去歸來期在粵城中

送毛鍊師奉祠禮成還京

仙官持節下青冥海瀆嚴祠衛百靈
行為治平循禹服禮從禋祀想虞廷
東風到處隨神雨南極歸來奏壽星

致福要當宣室問鶴書先報白雲扃

奉和吳宗師退朝

柳外朝冠古進賢雲開觀戶舊通仙蓬萊豈隔三千里
華頌宜過一萬年香並袞龍浮瑞日聲隨簫鳳下晴天
文臣不願金莖賜但想黃封到竹邊

弔張鍊師

名家接武依丹陛壯歲招魂入翠微遂使老聃成自弔
不知丁令竟何歸蛇蟬豈戀尋山蛻雞犬曾聞挾日飛

獨有皇恩無以報昨傳天語慰松扉

平臺晚懷

落日微風生晚涼平臺西上萬山蒼佳人獨不生同世
樂土那知是異鄉海岳雲霞千古意鄉關道路九迴腸
丹青不寫歸田賦徒以虛名累霍光

送別周儀之官錢唐并柬李四秘書

武帝龍飛第一春京華相送各沾巾詎知邂逅文身地
同是栖遲皓首人山驛蛟眠星滿洞水鄉鴈起月迷津

若逢李河南天竺為說前書感謝頻

將赴雷陽送羅提舉之任廣東

松滋暫泊薊門船復指番禺路幾千
茉莉香深和酒露
枕椰葉暗煮鹽煙齊人舊筭無遺策
漢史新藏有剩錢
莫為遐荒心力怠
朱崖更在海南邊

送人之五羊

豫章遠接五羊城白鳥飛邊道路明
昔我乘槎游汗漫
今君攬轡度崢嶸
湖堧夕下潮聲轉
斗角寒深寶氣橫

總為觀風揚職業有詩才不負茲行

以瓊扇一握奉致黃明府

拾得炎州月一團殷勤持贈比琅玕情知已是秋風後
留作明年九夏寒

鍾陵夜宿聞鐘

中年江海夢靈皇夜半聞鐘似上陽一百八聲猶未已
更兼雲外鴈啼霜

錢生幽禽圖

誰人剪下碧梧枝
誤落西風粉墨池
立斷小禽飛不去
朝陽何事鳳鳴遲

渡端州峽

權郎得便泝清流
忽報舟前曉霧收
蠻語酬人翻自苦
好山不敢問何州

挽西蜀先生

八十猶傳隱者名
乾坤未是負先生
無端白帝城邊水
欲載哀歌上玉京

憶得

憶得佳人白苧詞
幾將天外數歸期
自從落盡庭前樹
夜夜秋聲總不知

聞東郊夜歌

促拍繁歌沸不停
月高絃語轉明星
莫令知有西隣客
獨坐挑燈看六經

楊載

字仲宏建之浦城人官翰林編修

雪軒

北風海上來大雪何壯哉上下九萬里洗淨無纖埃君
家十二樓軒牕洞然開吹笙擊鳴鼓呼賓與銜杯名言
落四座大笑聲如雷舉頭望長空高興驚冥鴻仙人五
六輩飛下白雲中粲粲明珠袍相從萬玉童問君何所
事未就丹鼎功翩然如攜手共入蓬萊宮

題文丞相書梅堂

大厦就傾覆難以一木支惟公抱忠義挺然出天姿死
既得所處自頽乃不疑惻愴大江南名與日月垂我行

見遺墨再拜墮涕洟名堂有深意亦惟歲寒枝可知平
昔心慷慨非一時峨峨著棟宇昭昭示民彝勿使風雨
敗永慰千古思

次方韶父遊九鎖山韻

平生一枝筇畏踏市朝路出門見青山如鵲追狡兔茲
辰正炎暑赤日那肯暮振衣得冷風超若忘世故冥冥
九鎖雲未覩心已慕想當挾良朋盡取奇絕處曠哉天
壤間寓物豈為痼歸來思舊丘我服寧改素無官正爾

佳有子亦堪據誰歟事虛名白首不知誤

太古雪為楊友直賦

往時天大風能吹華山裂墜此一拳石或云太古雪粵
自開闢初雲氣所凝結已經六萬歲變化同巖嶭望之
色正白表裏共澄澈塵土不能浣光彩耀日月願君勿
愛此持以獻金闕回中避暑時持用消毒熱

東山詩為葉子實賦

東山高幾許上有浮空雲葉君居其間好道風所聞窮

年絕人事斲坐攷遺文松闕晝常掩石田朝自耘葆真
去汨昏養息襲氤氲軒冕有遺榮高舉謝世紛悠悠阻
林莽長與麋鹿羣由來巢許臣不事堯舜君

次韻袁伯長

盤盤海底石並樹青琅玕至陽生至陰龍宮常苦寒揚
光炫朝彩吐氣蒸微瀾根株厯千載莫測榮悴端端如
巢居子草木皮衣冠超然去人羣取友蹄與翰日誦黃
帝言浩歌淚闌干奈何天下治必以雲為官佩紉黃金

環咀丹白玉盤自聞至人德積熟生肺肝黃塵日暮起
對面不相看三山在何處使我師王韓聊歌紫芝曲倚
君清夜彈

次韻虞彥高游陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀槎牙怪樹凍不死
化作千丈蒼玉虬丹洞呀然仙掌裂翠峰巧矣蛾眉脩

梅梁飛去鐵鎖斷往往雷雨生靈湫軒轅緹神極秘怪
海上笙鶴時相投平生閉門讀史記子乃探穴先吾游
明當挾子騎汗漫題詩更在最上頭不妨山水樂吾樂
豈有飢溺憂民憂故家喬木尚可求有子有孫百世留
卧橫玉簫汎歸舟吹散萬斛江南愁

古牆行

建炎白馬南渡時循王以身佩安危疏恩治第壯輿衛
縮板載幹由偏裨下鍾江城但沙鹵往夷赤山取焦土

帳前親兵力如虎一日連雲興百堵引錐試之鐵石堅
長城在此勢屹然上功幕府分金錢謹聲如雷動地傳
爾來瞬息踰百年高崖為谷驚推遷華堂寂寞散文礎
喬木慘淡栖寒烟我入荒園訪遺古所見唯存丈尋許
廢壞終嗟麋鹿遊飄零不記商羊舞王孫欲言淚如雨
為言王孫毋自苦子孫再世隳門戶英公尚及觀房杜
如君百不一二數人生富貴當自取況有長才文共武
公侯之後必復初好把家聲繼其祖

時中兄示余畫一軸畫一老翁推獨輪小車上
載兩巨甕意其為警世之為因為賦詩

小人無他獨嗜利兩甕載車將遠致肩賴足趺汗潛然
冉冉脩程胡不畏世人但笑愚翁愚甕破即與瓦礫俱
不知人有千金軀前行險道方乘車

壽姚承旨

上帝黃金闕仙人白玉堂
皇猷資黼黻大筆主文章
間氣生奇偉休期際吉康
四朝承寵渥多士仰輝光
盡發

琅函祕重繡石室藏成書侔二典有道述三皇碩望高
天下榮光近日旁謀謨湏稷契羽翼藉園黃上殿扶鳩
杖開筵接蟻觴九重師道德千載合明良共說綸如綍
能推繡作裳人思興禮樂國待理陰陽舊族名先著高
門慶甚長賜書餘萬卷納笏過三床轉覺勛庸盛還欣
體力强朱顏朝映日素髮曉欺霜已注長生錄曾傳却
老方宜齊周李耳遠邁漢張蒼松柏深逾秀芝蘭久益
芳願公多壽祉仍見子孫昌

題信州先天觀圖

高林褰翠氣虛谷散虹光
道士多騎虎仙人自牧羊
澗泉通地遠山嶺際天長
戴子文為記流傳示不忘

寄劉師魯

想君游宦處正值洞庭湖
落日波濤壯晴天島嶼孤
舟航通漢沔風物覽衡巫
天下文章敝非君孰起予

蠹簡

往古韋編在何年始汗青蠹
蟲深卜宅科斗少成形泯

滅阡秦火搜羅出漢廷斯文天未喪不敢望全經

斷碑

摩挲不成讀上有蘇斑斑字畫鍾王輩文章漢魏間龜
跌凋鼎負螭首落孱顏渤海神明遠今同磴石頑

送孫大方歸朝元宮

高卧林泉表超然謝世紛空山鳴白雨古石繫蒼雲不
作夔龍伍甘從鹿豕羣都門游宦客回首總慙君

饒國吳文康公挽詩二首

欽定四庫全書

元音
卷四

厚德修天爵崇資拜地官粲然周典禮偉甚漢衣冠共
喜懸金印俄聞蓋玉棺史臣書寵數光照碧巔峴
道學由賢子推恩自聖皇白茅分壤土華袞賜衣裳漫
注長生錄虛傳却老方神游終不返瀛海路茫茫

送胡汲古之吳中

有客佩蒼精居然得此生山開棲越跡水泝入吳程佚
老悠悠計傷離戀戀情食尊方未已應不為魚羹

贈方韶父處士

蜀郡蘇明允襄陽孟浩然成名兼二子得句詫羣賢口
絕人間事身如物外仙卓然能有此未信獨無傳

宗陽宮望月

老君臺上涼如水坐看冰輪轉二更大地山河微有影
九天風露寂無聲蛟龍並起扶金榜鸞鳳雙飛載玉笙
不信弱流三萬里此身今夕到蓬瀛

大明殿早朝

玉氣浮空御殿開金衣照日近臣來絲囊已進千秋錄

黼座還稱萬壽杯
王子吹簫雙鳳下
羲和攬轡六龍迴
衢尊此日沾恩澤
散作祥風遍九垓

次韻陳子仁黃河

禹功疏鑿過憂勤
海內山川自此分
元氣渾淪通地脉
孤光迢遞貫天文
母金伏礫秋逾盛
陰火藏淵夜不焚
多少魚龍爭變化
總歸西北會風雲

送戶部康里尚書

經濟才高負重名
早超蘭省執權衡
唐除宰相同三品

漢拜司農列九卿禮樂正圖興美化
錐刀先務已苛征
公家事業齊周召重使斯民望太平

紀夢

海上垂綸已有年平居無事夢朝天
蒼龍觀闕東風裏
黃道星辰北極邊治世只今逢五百
前程如此隔三千
揚雄曾奏甘泉賦應有聲名達帝前

題拱北樓

殷地鼓鞀迎日出倚天梁棟與雲浮
北瞻帝闕三千里

南控臣藩二百州江海無波沉罔象旌旗垂野駐貔貅
鸞回麗榜多深意綉袞于今有魏牟

題本齋王公畫像

詩禮傳家德望隆一門三世拜三公五營帶甲軍容盛
九府流泉國賦充房魏素懷尊主術龔黃先奏養民功
欲將惠澤量深淺楚浸洋洋與海通

錢唐懷古四首

山回禁籞入雲長無復陳兵衛兩廂千石金鍾埋野草

萬年珠樹落秋霜
龍文不徙陽人聚
鳥篆終降輶道旁
九市塵埃來袞袞
一江波浪正茫茫

西湖清濁自天開
鴻雁鳬鷺日往來
黃道星辰環太乙
紫雲宮殿擁蓬萊
論文競奏王褒頌
獻壽深傾阿母盃
九域輿圖今混一
百年耆舊獨興哀

斜界鉤陳通大道
中分魏闕對層巒
雲生殿上金爐暗
露下庭前玉井寒
江漢飛龍俄杳杳
滄溟泛鷁竟漫漫
中天會合寧非數
坐見蒼生奠枕安

化人宮闕被層阿棟宇高低若湧波翠石文章書日月
寶珠光燄燭山河空桑說法黃龍聽貝葉翻經白馬馱
誰謂一無超衆有只今塵土重來過

送表伯長扈駕

闕

前驅盛國容黃麾仙仗衛重重星流曠野飛蒼鵠

日

闕

馭赤龍耀武邊陲須北狩合祛天地待東封

論才孰可銘休烈扈聖還宜祀岱宗

懷錢唐故人東應中父

幾年流滯客京師
每憶江邊話別離
落魄已甘心似鐵
蹉跎無奈鬢成絲
草玄思苦無人問
彈鋏長歌只自悲
滿目塞雲飛去盡
倚筇獨立更多時

留別京師

囊衣橐載道傍車
人事匆匆歲欲徂
風雨四更鷄亂叫
闕河千里雁相呼
蕪菁散漫根猶美
桑柘蕭條葉盡枯
却上高丘重回首
五雲飛繞帝王都

送薛玄卿歸龍虎山

金門詔下羽人歸，欲向山中採薺薇。
琥珀懸崖松樹老，琅玕倚澗竹根稀。
高巖蓄雨星辰濕，古石緣雲逕路微。
養性可無軒冕累，游塵元不浣仙衣。

送羅雲叔歸山

黃石山原風物幽，賤子往年曾一遊。
舊行縻柘已成徑，新藝麻禾應滿疇。
馮衍能忘白首歎，謝安須為蒼生憂。
餘杭溪上明日發，愁殺楊花吹客舟。

壽饒國公

可樂無如父母全既賢既貴又長年金壺賜出青雲上
玉佩朝辭白日邊楚木論春猶五百蟠桃稱壽必三千
侶聞黃綺歸來後長向山中作隱仙

贈同院諸公

詔編國史有程期正是諸郎倬直時虎士守門宮杳杳
雞人傳箭漏遲遲窓間夜雨銷銀燭城上春雲壓彩旗
才大各稱天下選書成當繼古人為

送吳真人

具嚴威命領祠官歷祀名山不厭難上帝乘龍游下土
真人騎鶴上靈壇已刊白玉為封檢更鑄黃金作祭冠
國壽延洪千萬歲願祈穀熟小民安

寄吏部尚書張公

復喜清朝用大賢玉音俄對廣庭宣姚崇已托君臣契
李泌終持將相權此日經綸須展布他時簡策要流傳
淵明有待公田米可念江湖久棄捐

次韻辛良史早朝

掖垣迢遞到城回
魏闕嵯峨此日開
赤節會同宵仗引
朱輪爭道曉鐘催
三象忽報藏金甲
萬歲徒聞進玉杯
樂奏象筭從此畢
小臣思見鳳凰來


題鍾呂傳道圖

濟世曾聞有大才
超然脫屣去塵埃
劍光昱昱今何在
上下乘龍戲九垓

題鄭子真畫像

躬耕谷口襍編民
寧肯懷金媚賊臣
揚子解言如許事

不知孰孰是何人



元音卷四

欽定四庫全書

集部

元音卷六

詳校官中書

臣丁榮祚

助教臣常循覆勘

總校官降調編修

臣倉聖脉

校對官修撰

臣吳錫齡

謄錄監生

臣王鍾岱

欽定四庫全書

元音卷五

虞集

字伯生號邵菴蜀郡人翰林學士

題商德符華山圖

昔祠雲臺館行穿御階栢夕陰嵐氣深重碧照行客獨
訪張超谷漸覺巖險迫冰生玉井頭日射仙掌側豈無
鐵鎖懸翻身若飛鵲恐煩華陰令不奈昌黎伯王事況
有程車馬何忽忽流觀終南山周覽天府國爾來十七

年欲往不再得山河想邈悠傷殘轉蕭索摩挲商老圖
彷彿希夷宅高哉蓮花峯白雲澹秋色

次韻陳溪山稷履

頗憶蜀井西稷欄每易討披心割魚子束皮充彗掃湫
工巧紉履文織象花草輕鬆隔沮洳緩步得堅好長跪
獻圯下會期後三早知君貴踐履陟降恒有道憐我涉
世深垂誠不待造兢兢歷淵冰縮縮奉師保時行不違矩
庶慙歲年老

題薛外史瓊林臺

高臺積方石瓊林樹交柯
晨光眩白雲夕景纏紫蘿
每聞樵子唱恐是仙人過
塵世在足下豈能聞笙歌
過海只騎鶴開池還養鷺
外史正瀟洒太白馬足多

題許愿夫抗雲樓

城居苦迫隘層闌上峇堯
措身方丈間千里能自超
可以抗浮雲誰能顧塵囂
擬峴有古臺遺碑正蕭條
子固若星斗其魂安可招
龐公輟耕際曠懷見凌霄
賦詩托

飛鳥長空何寥寥

次韻袁伯長賦陶心

憶昔白雲君高居保黃寧夕煉黃帝鼎晨註神農經羣
真時滿座逸響每盈庭寸田既無畔幽闕那有扃飛凌
萬物表婆娑垂帶鈴歸來塵世外曾孫宴虛亭所志在
高遠三峯列青冥頽然得所止一念三十齡崐崙安明
珠旭日曜帝青槃桓有童子松根求茯苓

趙千里出峽圖

巨舟臨峽口衆工志如一各以所操濟雖危萬無失所
憂在平曠玩肆生縱逸母俾持釣翁倚岸三太息

哀陳童子

南山有鳳雛飛來上林樹祇承朝陽輝不食秋夕露珠
零海氣盡壁毀月光曙巫陽不能招荔丹滿洲嶼

于仲元舍賦紅梅

白雪不成夜丹霞遂崇朝妙質承日暎飛英向風飄醉
來紅袖近歌罷綵雲消揚州問何遜可以董嬌嬈

題儋耳東坡載酒堂

翳翳儋耳城歷歷枕榔樹百年遺故丘新堂設賓昨清
風海上至朝陽在庭戶丹山五色鳳覽德屢來下

應制題王壯畫吳王納涼圖

雨過太湖上風生響屨廊紅綃拂几席白紵製衣裳朱
光淪厚地明月在高堂何以保玉體長年樂未央

題水木清華亭

中流汎蘭枻望彼嘉樹林落日蕩野水浮雲生夕陰魚

游戀芳藻鳥鳴在幽岑為樂恐易老吾將脫朝簪

出直次韻

月下白玉階露生黃金井疏條栖鵲寒衰蕙流螢冷戀
闕感時康懷歸覺宵永晨鐘禁中來白髮聊自整

酬上清道士鈔陰何詩

殘雪松上落輕冰硯裏生寫詩過夜半散枕又天明少
陵愛何遜太白似陰鏗不愁勞弱翰亦足助高情

金人出塞圖

海風吹沙如捲濤高為阨磧深為壕築壘其上嚴周遭
名王專居氣振豪強弓大馬田為遨八月草白風颼颼
馬食草實輕骨毛加弦試弓復置橐今日不樂心慄慄
什什伍伍呼其曹銀黃兔鶻明繡袍鷗鵠小管隨鳴靴
背孤向虛出北皋海東之鷲王不驕錦韉金簇紅絨條
按習久蓄思一起是時晶清天翳絕駕鵝東來雲帖帖
去地萬仞天一瞥離婁屬望目力竭微如聞音鷲一掣
東身直上不回折遂使孤飛一片雪頃刻平蕪洒毛血

爭誇得雋頓足悅旌旗先歸向城闕落日悲風起蕭屑
烟塵滿城鼓微咽大帥要王具甘歡王亦欣然沃焦熱
關支出迎騎小驥琵琶兩姬紅顴頰舞歌迭進醉燭滅
穹廬斜轉毼毼月

題柯敬仲畫

予先世居隆州州治之後山石室翁守郡時隆為陵
州州事簡時來就吾家拾故紙背作茅蘭竹木之屬
所得頗多吾幼時尚收得數紙今亦亡之丹丘生用

文法作竹木而坡石過之近又以新意作墨花甚妙
從子悅有眉山學官之行丘為作此予愛而賦之

昔者老可守陵州守居北山吾故丘太守時來看山雨
每畫紙背成滄洲老蒲松煙色過重揮霍陰崖交劒矛
百年離亂亡故物敝篋江南誰復收新圖質簪枝葉修
使我不樂思昔侯碧雞祠前杜鵑叫玉女井上叢篁幽
棠梨樹高青子落碧花翠蔓縈牽牛揚雄無家不歸老
蠨蛸蟋蟀寒相求丹丘先生東海客何以見我空山秋

蕭條破墨作清潤殘質刊落精英留陂陀重複分細草
山石縈紆生亂流眉山學宮莫厭冷言歸故鄉非遠遊
石田茅屋儻可得萬里欲上東吳舟百花潭深濯新錦
持報以比珊瑚鈎

為達兼善御史題墨竹

蜀道荒涼多古木簣簣千尺相因依少年慣見今白髮
杜宇夜啼愁不歸老可嘗作陵州守古木蛟龍多入手
春雷每恐破壁去神鼎空令夔魃走丹丘越人不到蜀

修葉何以能縱橫內府人家爛漫寫使可見之心亦驚
江南御史龍頭客暫別那能不相憶知君深識篆籀文
故作寒泉溜崖石

子昂墨竹

吳興畫竹不欲工腕指所至生秋風古來篆籀法已絕
止有木葉雕蠹蟲黃金錯刀交屈鐵大陰作雨山石裂
蛟龍起陸真宰秘雲暗蒼梧泣湘血吳興之竹乃非竹
吳興昔年面如玉波濤浩蕩江海空落月年年照秋屋

送戴真人歸越

戴先生日飲五斗醉不得再飲一石不肯眠昨從桃源
來兩袖攜風煙長安道上小兒女拍手攔道呼神仙馬
如游龍花如雨蹴踏春秋作朝暮東方不作窓間戲上
帝還令海邊去海邊玉虹夜不收貝宮珠闕皆蛟虬芝
田玉樹久相待天上老仙那肯留戴先生鑑湖之水三
千丈不可以鑑可以釀明朝亦脫錦袍去與汝酣歌釣

船上

題柯博士畫

磯頭風急潮水長
蕙葭蒼蒼繫魚榜
青山一髮是江南
白頭不歸神獨往
幽篁繞屋茅覆簷
木葉脫落秋滿簾
買魚沽酒待明月
定是黃州蘇子瞻
子瞻文章世希有
謫向江波動星斗
夜投斷岸發清嘯
栖鶻驚飛怒蛟吼
圖中風景偶相似
欣然揮灑春雲開
子瞻應是念鄉里
還化江東孤鶴來

題金馬圖

賈客自騎千金馬解囊小憩荒城下平原無樹起秋風
夢入陰山雪橫野太平疆宇大無外外戶連城無閉夜
不然安有獨行人懷寶安眠如畫者

題花鳥圖

吳中女兒顏色好洗面看花花為俏調朱弄粉不自施
寫作窻間雪衣鳥綠牕沉沉春晝遲半生心事花鳥知
花殘鳥去人不歸細雨梅酸愁畫眉

白翎雀歌

烏桓城下白翎雀雌雄相呼以為樂平沙無樹托營巢
八月雪深黃草薄君不見舊時飛燕在昭陽沉沉宮殿
鎖鴛鴦芙蓉露冷秋宵永芍藥風暄春晝長

慶史顯甫治書父八十

治世尊三壽高年見八朝羽儀參漢皓神觀邁周喬柱
下聲名遠壺中日月饒微醪霞灼灼新沐雪蕭蕭地厚
源初浚天金玉不凋一經傳令子貳憲肅羣僚侃侃稱
時望英英樹國標繡衣魚綵服白日上青霄上壽歸榮

異推恩錫爵超紫深宗伯索金重列侯腰珍膳應恒設
安車必見招乞言逾藥石報德稱瓊瑤千歲庭來鳳羣
工韻合韶陳詩方懿頌擊壤比康謠

題秋山圖

峰迴留深隱天清襲素袍棲身斷人蹟游目送鴻毛樹
挂栖厓鷲藤懸飲子猿龍眠石潤冷虎撼樹根牢木客
吟時共山樵奕處遭浮雲過水盡孤月挾霜高羽使來
三島胎仙舞九臯左招玉斧飲右攬赤松遨空色收寥

廓虛聲起繹騷彈琴遺古散載酒棹輕舸遂向圖中見
誰能世外逃乘槎幾日至一泛九秋濤

正月十一日朝回即事

宮樹春陰合霓旌拂曙來天光臨閣道雲氣轉蓬萊
晝漏沉沉鼓晨尊艷艷杯香霏簾底霧樂殷殿前雷
祥瑞儀曹奏珍淳尚食催舞庭分鷺序效獻過龍媒
融雪微生草輕風不動埃老人南極至王母上方回
玉色何多喜金華得重陪裁詩賀新雨西閣待門開

次韻馬伯庸少監四首

仍歲從巡幸山川識重臨
講帷來濟濟馳道止駸駸
三月衣裘薄諸生坐席深
歸耕何待老莫問二疏金
移蹕宮城曙烟花繞閣重
來王俱屬籍稱使不傳烽
賜席還親問囊書更手封
恐煩宣室召眡日轉蒼龍

臣甫多愁思長歌拜杜鵑
鑿厓通閣道積水放樓船
惆悵霜橫野棲遲雪滿顛
經行看宿草碧色自年年

太平知永日漸老惜芳晨
論說慚孤學推揚負相臣
退

思嘗感慨拜賜每逡巡郊藪多閒地餘生托鳳麟

奉別阿勒呼木東泉學士遊甌越

憶昔同經幄春明下玉除挂冠俄去國連舸總盛書
筍脯嘗紅稻蓴羹斫白魚莫言江海遠咫尺玉堂廬

送長沙守

白髮長沙守循良又好文近辭金馬去遠有玉魚分
對竹聽湘雨開簾看岳雲漢廷思賈誼一飯莫忘君

代衆仲作

昔在泉州住將軍每見招春雲山對屋夜雨水平橋池
鴨穿荷葉溪魚上柳條禁城鐘鼓起車馬晚蕭蕭

送王照磨之官雲南

遺廟珍珠浦歸舟楚道溪飛鳶愁暑雨走馬畏山泥官
署尊丹鷺祠宮勝碧雞題詩遠相送紅日五雲西

八月八日有感題視草堂壁

載筆趨芸閣探囊索縕袍坐銷秋日淨心折夜風高識
字頭先白謀生計轉勞文園多病渴常想賜蒲萄

御溝詩次宋顯夫韻

御溝雪融三月初
鳬鷺鴻雁總來居
蒲萄水綠可為酒
楊柳條青堪貫魚
逶迤天河起箕尾
滉漾雲海浮青徐
舟前花落傍飛燕
隄上風來濕舞裾
翠輦時留金駟裏
錦波不著玉芙蓉
臨流宋玉偏能賦
莫待東都客問予

題故太子少傅翰林承旨李野齋幽居圖

車蓋歸來托遠林
魯山崑崙魯原深
漁樵相識頻分席
賓客時過共賜金
百歲儀刑猶近古
五朝文物至于今

披圖想見登臨地松滿徂徠起夕陰

賦張志甫八十

身閱昇平近百齡顏如玉雪鬢如星
遠移湘竹堪扶老舊種蒼松已茯苓
頓見大官躬致饋早令掌故口傳經
古來名士多肥遯徧與題詩歷下亭

送韓伯高僉憲浙西

正月樓船過大江海風吹雨洒船窓
雲消虹蜺橫山閣潮落龜鼉避石砦
闕下諫書誰第一濟南名士舊無雙

湖陰暑退多魚鳥應勝愁吟對怒瀧

王氏孝義詩

奉元人

陰陰榆柳蔭韋村中有烏頭孝義門耕織事均家益贍
總麻親盡義彌敦蜜蜂日暖開窻戶慈竹春深長子孫
先世此邦嘗賜履為歌遺俗却消魂

寄福建僉憲馬叔惠

荔子枝頭火齊紅高堂紈扇坐薰風湘筠簟冷魚波合
海柏梁深燕語通絡緯豈知秋袂薄虞戾長憶晚餐同

禁城來看花如錦誰道清霜解惱公

次韻道士竇神清賦舜粟

帝德無為保太和
厯山遺種有嘉禾
想經稷教躬耕法
正是堯時擊壤歌
旆旆九秋新雨露
離離千古舊山河
曲肱飲水幾忘肉
畢竟宣尼感歎多

贈竇神清歸隱茅山

翩翩歸鶴自遼東
又向茅山擬住冬
啄食定依何處竹
結巢應得古時松
雪滿空山騎一虎
月明秋水佩雙龍

別來彷彿三千歲亦欲還栖第一峰

送宋誠甫太監祀天妃

使者受節大明殿候神海上非求仙廟前水生客戾止
帷中靈語風泠然麗牲有石載文字沈璧用縑求淵泉
賈生何可久不見海若率職君子還

贈昇龍觀主

榻前親製先生號賜與江南謝舜咨太華雲開天使下
少微星動史官知龍飛滄海留珠樹虎卧丹房守玉芝

聖主無為千萬壽更應築館候安期

賦壺洲

傳聞海上有玄洲曾是安期舊所遊
千頃白雲都種玉一杯弱水不勝舟
魚龍夜護黃金鼎鸞鵲晨朝紫綺裘
波浪不驚星斗近步虛聲裏度清秋

寄趙子敬平章

聞道乘閒入翠微猶愁嵐氣濕人衣
道傍野樹飛花盡溪上春雲作雨歸
故舊釣絲輕在手仙人棋局靜忘機

赤松曾許同千歲擬向高秋伴鶴飛

別國史院勅峰石

秋雨莓苔數尺身文章曾見百年人吁嗟一代興王盛
付托諸公製作新
野有詩皆在魯泰山無刻更先秦
鳳麟一去無消息空使駑駘愧後塵

神鳳琴

鳴鳥人間久不聞遺紋欲托斷琴紋曾看土鼓歌朝日
亦共陶尊醉夜分
五色雲中迎太乙九疑山下望湘君

采詩應被唐風譜早晚樓船或祀汾

謝書巢送宣和瀘石硯

巢翁新得瀘州硯拂拭塵埃送老樵毀壁復完知故物
沉沙俄出認前朝臺翻夜雨天垂藻墨泛春冰地應潮
恐名相如今草檄為懷諸葛渡軍遙

題東平王與盛熙明手卷

宋宣和手勅一通卷首題識四字我朝英宗皇帝御
書也帝嘗以至治三年正月十五日幸五華山臣有

以此書獻者丞相拜珠侍側就題以賜之既歸第曲
先盛熙明寫金字佛書一帙贄丞相丞相因以此卷
贈之且語以其故至順三年三月八日熙明屬歐陽
玄記其事于左方

聖代御題前代勅小臣叨備史臣書事業久為人土苴
文章猶作世璫璵海淪碣石圖空在墓築祁連計已疎
誰識全燕天所靳萬年形勝帝王居

題暖翠亭

老去唯思卧白雲一亭萬竹喜初聞
波迴曉日鴛鴦並
沙散晴烟翡翠分
把釣左泉歸衛女
乘舟北渚望湘君
誰能獨采薇盈袖
却道高寒思不羣

觀著色山圖

江樹重重江水深
楚王宮殿在山陰
白雲窈窕生春浦
翠黛嬋娟對晚岑
宋玉少時多諷詠
江淹老去倦登臨
扁舟却上巴陵去
閒聽孤猿月下吟

題畫

緝熙殿裏御屏風零落誰收百歲中
錦樹總含春雨露
畫橋猶是舊青紅
花開陌上懷歸燕
潮落江頭送去鴻
何侶綠波生太液
絳桃風急綵船東

題張希孟中丞送畢中達提點卷後

十年七聘不還朝
起為飢

闕

軺嘉樹百年誰忍伐

生芻一束不能招
西州華屋交遊少
北海清尊意氣消
欲寫濟南名士傳
泉聲山影晚蕭蕭

寄泉南三老人

春城連海樹扶疎中有幽人八十餘
庾信流傳江左賦
伏生零落濟南書
鄰翁社舞尊多酒
弟子晨炊饌有魚
前代衣冠今絕少
故懷三老載安車

白雲間上人度夏

白雲長傍太湖飛
忽向西山度釣磯
彭蠡小龍邀共飯
潮陽遷客憶留衣
筍因春雨朝朝喫
橘待秋霜顆顆肥
我自本名無所住
經函松下共柴扉

寄魯學士

往歲樓船過太湖
珠簾翠幙護圖書
泉南五馬傳燈後
天上羣龍進講餘
滿座賓朋尊有酒
盈疇稷稻食多魚
趨裝未覺曹參晚
應有賢人載後車

甲戌四月十七日至臨川冲雲寺祝聖齋罷賦

此

郭西寺門雙石頭
水鑑相對林塘幽
白花過雨落松暝
黃鳥隔溪鳴麥秋
衰朽虛蒙宣室問
淹遲實愛小山留
為貪佛日同僧話
滿袖香烟念舊遊

次韻聶空山送杏

看徧生紅雨滿林筠籠遠致百九金遙知過熟心先喜
猶恐微酸齒不禁淺琰便應催泛蟻封囊何必共來禽
唯當種挾成佳樹花繞春壇坐鼓琴

即事 四月十六日

卧病丘園忽五年千官此日正朝天縣公稱壽邀相共
野老扶藜拜不前帶拭文犀看舊賜髮垂明鶴愧初筵
莫愁小邑天光遠朝蓋靈芝五色鮮

予少年過薊門酒樓賦此題曰連十八書郡人
疑其為呂洞賓詩謾記于此

耳目聰明一丈夫飛行八極隘寰區劍吹白雪妖邪滅
袖拂春風槁朽蘇氣侶酒酣雙國士情如花擁萬天姝
如今一去無消息祇有中天月影孤

李伯宗錄詩

老去逢春祇謾吟敢煩彩筆為追尋玉堂天上成塵夢
茅舍山中稱野心萬里雲霄歸鳥盡孤村風雨落花深

文章傳世知何用空使高情慨古今

端午節飲客與趙伯高

龍沙冰井夏初融簪筆長隨避暑宮
蠟燭烟輕留賈誼銅盤露冷賜揚雄
南村久病思求艾北客多情問轉蓬
忽聽滿船歌白苧翻疑昔夢倚春鴻

鶴

予家有薛少保鶴圖一大軸先尚書自蜀攜至此邑
以為珍玩先參政晚歲失之不知所在當時極惋歎

今二十餘年集妻姪浚儀趙德莊從好事家重購得之欲集識其故而歲諸篋笥為賦此

吾家舊物薛公鶴老氣崢嶸壓九皋鐵石閣身脩足脰
雪霜依骨淺翎毛通泉久失千年壁杜甫空吟一世豪
老去思鄉歸未得時時借看倚秋高

周昉畫美人圖

島上雲生日轉欄海風吹面暮寒尖春明玉色遺香澤
夜定珠光入鏡奩纖得鴛鴦成綠皺教成鸚鵡啄紅甜

試令鼓瑟應無語目斷歸帆思未忺

費無隱丹室

碧雲雙引樹重重除却丹經戶牖空一徑綠陰三月雨
數聲啼鳥百花風年深不記栽桃客靜夜長留賣藥翁
幾度到來渾不語獨依秋色數歸鴻

寄澄湛堂

月中桂子落巖阿想有林間閱貝多持足地神衣拂石
獻珠天女鞭凌波香因結願留龍受水為烹茶喚虎馱

寄到竹西無孔笛吹成動地太平歌

賦雪洲

江上經年憶雪多長洲化作玉陂陀舊時射虎迷蹲石
薄暮歸漁認擁蓑河伯作宮龍獻壁湘靈遺珮鳳停梭
鳬翳客與江花發更待春來生水波

送胡古愚

仙館醉餘千石酒上林吟遍百花風拾遺徒步頭雖白
供奉歸來錦更紅晚下紫微憐病鶴春生綠水送冥鴻

故人江上如相見為偕扁舟候禿翁

羅若川畫松

暮春多雨晝冥冥羅生畫松當翠屏老蛟化作劍氣黑
白鶴下啄苔痕青傳來日暮自篝火夢入幽巖尋茯苓
不遇胡僧露雙脚石函自了讀殘經

挽文山丞相

徒把金戈挽落暉南冠無奈北風吹子房本為韓仇出
諸葛寧知漢祚移雲暗鼎湖龍去遠月明華表鶴歸遲

不須更上新臺望，大不如前洒淚時。

朝回和周待制韻

三十六竿吹鳳皇，九重春色絢天光。
卿雲微動旌旗暖，湛露初晞草木香。
貝葉神師東度嶺，金輿馴象北浮洋。
小臣職在謠功德，拜手陳詩對日長。

贈道士

神室誰開自洞微，紫烟為戶玉為扉。
春容淡薄胎仙舞，夜景虛明脉望飛。
繞指風雷龍睡醒，滿囊雲錦虎馱歸。

猶嫌長物煩聞見更上高樓一振衣

贈道士鄒雲山

一片春雲萬仞山六鼇戴向海波間金銀樓觀蒼龍戲
日月旌旗白虎閒換骨有丹宜早服虛心如水平秋還
九重元與蓬萊接看爾仙衣簞玉班

贈無塵道人

雲霧為衣月作裳天壇獨自禮虛皇龍收古劍沉秋水
鶴識神丹起夜光金井有聲惟墜露玉堦無色乍凝霜

無端下界松風動又欲飄然上鳳凰

送朱仁卿

羨子南歸肝水上經過為我問臨川
幾家橘柚霜垂屋何處蒹葭月滿船
應有交遊憐遠道好從父老說豐年
寒機早晚成春服一一平安報日邊

玉華山

何處清江擁玉華手題名榜寄仙家
光凝石殿千年雪影動銀河八月槎
藏藥寶函騰玉氣說詩瑤席散天葩

奎章閣吏無能賦得似新宮蔡少霞

雙檜軒

素王舊植魯宮牆雙樹陰陰接太行冰雪高寒今節操
雲雷參錯古文章河津此日營舟楫廊廟他年待棟梁
會與羣龍近華蓋九天朝日正蒼涼

王庶山水

蜀人偏愛蜀江山圖畫蒼茫咫尺間駟馬橋邊車蓋合
百花潭上釣舟閒亦知杜甫貧能賦應歎揚雄老不還

花重錦官難得見，杜鵑啼處雨斑斑。

張道士蜀山圖

碧玉參天是蜀山，舊曾飛步歷孱顏。
松風上接空歌外，蘿月空懸合景間。
試劍丹崖秋隼疾，濯纓清澗夜龍閒。
君家虛靜歸來日，冉冉蓬壺為憶還。

畫虎圖贈貞一先生

獵獵霜風木葉乾，月明曾過越王山。
青龍久待蟠仙鼎，赤豹相呼守帝關。
終歲采芝茅阜曲，豐年收穀杏林間。

誰家稚子能為御長與桃椎共往還

玉堂讀卷

玉堂策士詔儒臣御筆親題墨色新
省樹坐移簾底日宮壺馳賜殿頭春
虞廷製作變龍威漢代文章董賈醇
書閣莫年偏感遇但歌天保播皇仁

謝廬陵兩劉君

扁舟已作度江雲回首高年憶兩君
座客頗知韋刺史詩人猶拜杜參軍
總看玉樹當春晝長對青藜過夜分

他日聚星如可畫殷勤垂白更論文

宣和墨竹寒雀

洒墨寫琅玕深宮春晝閒蕭條數枝雪不似紇千山

雙鴛圖

戢翼石梁陰秋風日夜深使君莫行野江水蕩人心

畫扇雀竹

啄粟野田暮飛鳴亦求雌誰家江上雨發船歌竹枝

畫雙蝶

舞罷庭花落池邊看睡兒無端雙蛺蝶飛上繡羅襦

題柯敬仲雜畫十二首

北苑今仍在南宮奈老何青山解浮動端為白雲多
雨過蒼苔石雲生野岼泉幽懷春冉冉稚子秀娟娟
鐵石餘生色冰霜作曉妍春雷明日起何處尚龍眠
雨過黃陵廟蒼梧雲正愁何時倚虛幌對此滿林秋
江山秋漠漠風雨晚蕭蕭千載誰相識唯應待老樵
昔過篋簋谷鉤衣石角斜擬尋龍作杖拾得上天槎

黃金千鎖甲瑤玉六簾鉤雨送鴛鴦夢煙籠翡翠愁
娟娟生玉潤楚楚作金聲羽扇迎風定羊車過月明
峽口春雲重江南夜雨多水深桃葉渡風急竹枝歌
蒼涼初出日黃落早知秋不遇采芝客寧知叢桂幽
明堂要梁棟大匠取修直鬱屈崖石間秋風動蕭瑟
平陸蒼龍起近山生遠烟前村三萬頃明日水平田

青山白雲圖

獨向山中訪隱君行窮千澗水沍沍仙家更在空青外

祇許人間禮白雲

竹杏沙頭鷓鴣

胡蝶飛來石竹叢
羅襦曾試繡文重
荷花啼鳥銀屏煖
卧看窓間唾碧茸

錢舜舉折枝芙蓉

白髮多情憶劍南
秋風溪上看春酣
剪來一尺吳江水
擬比千花濯錦潭

商德符小景

五老峰前數往來紫雲如蓋蔭崔嵬十年京國頻看畫
最愛高僧坐石苔

題古木畫

高秋木落洞庭空岳陽城南多晚風蛟龍夜護玉壇古
劍影長留明月中

子昂幽蘭修竹

舊時長見揮毫處修竹幽蘭取次成欲把一竿茗水上
鷗波千頃看雲生

送上黨長

春雨人參長紫苗
縣庭無事坐終朝
俯看雲氣千山表
野有新田市有謠

題柯敬仲雜畫

夢裏江南憶舊遊
明璫翠佩不勝愁
一鉤纖月清如水
吹笛何人共綵舟

題著色山圖

巫山空翠濕人衣
玉笛凌虛韻轉微
宋玉多情今已老

閒雲閒雨是耶非

子昂蘭石

汀草離離石老蒼
行吟何處樂清狂
江中遺佩相思久
莫待明年春蕨長

題黃敬申虎圖

當時玉帳蜀雲西
坐嘯風生草木低
傳寫餘威千載外
空山藜藿尚萋萋

元音卷五